

荔村草堂詩鈔

荔村草堂詩鈔卷第七

南海 譚宗浚 叔裕

使蜀集上

起丙子八月迄戊寅十二月詩二百四十首

出都口占

朝衙

鳳詔出金鑾西望峨岷指顧閒自愧菲材持蕩節要令
文教關榛菅地多名勝供題句身處脂膏覺厚顏昨夜
夢回清漏迴依依猶憶

紫宸班

驛馬行

道旁驛馬使我傷病骨柴立身半黃奚奴初跨已屢蹶
鞭策不復能騰驤有時長嘶向天末氣象慘淡無晶光
國人鞠躬向我說馬政得失渠能詳王良上天伯樂死
人間幾見真驕驪況茲官馬備差遣但有羸瘠無軒昂
坐令疲駑充上駟先後山谷頻倒僵馬兮努力且服箱
勿復踴躍悲蒼涼君不見邇來置臣重防海峨舸大編
千丈強伸時鍊車又開路北極一日通南荒縱令千里
得奇駿豈非機器誇重汗龍鬚鳳臆亦安用只合槁餓
隨道旁馬兮馬公公跡瘦焉足傷

夢舍弟

侵晨尚讀天南札今夕團圞忽故鄉觀面乍逢偏錯愕
含情欲語又遺忘點求偕隱難償願軾轍游蹤且異方
但使連宵頻入夢強如風雨共聯牀

過獲鹿

山缺見孤城城橫一線平雲隨征旆出石向縣樓生陶
窳多仍舊荒田未廢耕時清方弛柝按傳好徐行

韓侯墓

百戰真人傑中原任指揮儻令誅呂雉何必藉陳豨毅
魄至今在奇冤終古稀不逢遷史筆誰爲表幽微

驪山秦始皇墓下作

平桓失政殲天綱，雄冠利觜爭擅場。有羸鶉首本帝賜，
天府雄踞連氏羌。削平九州滅六國，美人鐘鼓陳阿房。
自從周衰苦積弱，獫狁侵伐踰鎬方。義渠大荔各部署，
鼠穴潛竄皆侯王。祖龍奮鞭始赫怒，埽盪萬里如粃糠。
冠裳混一意未已，要使羯狄俱摧藏。北征藍胡係頸組，
南破桂嶺開陸梁。登峯刻石頌功烈，此事果足銘崇岡。
古皇尙德但柔遠，幾見臣僕窮梯航。漢隨唐宋遞更嬗，
猾夏往往愁邊疆。議和割地已堪歎，或更縉幣供廟堂。
偉哉蜂準實雄武，威略凜凜驚遐荒。當時邊塞儻弛備，
鎬洛便已盈犬羊。況聞開國定制，度排棄俗議更新章。

罷侯置郡息爭戰收兵鑄鑠銷鋒芒雖云巡幸徧騷擾
未肯酖毒娛安康程書量石漏三下舉動要亦非尋常
我疑史公述秦紀覩縷虐政恆鋪張正如辛紂本淫酗
武成泰誓多荒唐獨惜臣斯秉鈞軸背違師說崇申商
焚灰棄市已苛刻況乃六藉俱淪亡用人失當自貽戚
二世一蹶難再昌不然雄略震區宇豈屑漢武兼唐皇
我來弔古發奇想拔劍起舞歌慨慷靈風彷彿尙來往
怪鳥格磔塵沙黃

游具九詠

笠

落日四山暝悄然孤影斜庇人原適用隨我亦離家舊
迹偶留蘚餘香時冒花定輸農圃樂聽雨話桑麻

屐

無分隨珠履泥塗可若何提攜農具共跋涉客途多老
圃甘澆菜空庭任踏莎一生能幾兩歲月感蹉跎

扇

一片團圓影能生六月秋催來新茗熟題得小詩留忽
憶鄉園住欣看隴畝收葵田饒萬頃佳況敵封侯

劍

平生非俠士匕首照人寒洗刷騰光彩摩挲露膽肝用

逾飛鶴捷鬱作老蛟蟠留待酬恩試侯門莫漫彈

琴

七尺絲桐耳中存太古音醇和君子德幽咽美人心冷
露浩如瀉素波搖更深此時彈更撫寥絕竟誰尋

葫蘆

長柄江南種枵然五石空成材因老大入世漸圓通藏
貯宜詩料攜持代酒筭前身曾記否秋雨豆棚中

杖

世途艱險甚出入仗匡扶合伴形骸瘦休嫌骨相麤秋
腴來得得春隴負于于儻化陂龍去騰雲上勢衢

櫻拂

有塵方去垢未若本無塵仙躋凌虛步禪門入定身何
曾資拂拭從未受緇磷憐汝形模陋徒供握玩頻

硯

汝本端州產行勝共載便藏珍曾洞壑噓潤卽雲烟潔
比卞隨璧堅逾秦漢瓢寰區頻報歉忍使獨豐年

謁西嶽廟

帝坐三清迴神區八水長高秋臨顙氣壯觀聳殊荒勢
壓乾坤上靈通日月旁擎天瞻玉柱輦地洒銀漿萬岫
深涵霧三峯迴暎霜並尊惟泰霍終古鎮岐梁祀典欽

羣望仙居儼上方珮環鏘玉女旌鉞肅金皇珠節森迎
爽瑤繩耿接光憑威雕虎嘯馭氣素鸞翔古廟何魏煥
前朝溯渺茫巡遊唐典禮銘刻漢文章列衛環丹殿千
官繪畫廊柱蚪承翕施檐馬戛丁當拾級登寵從遐觀
極莽蒼窗收秦時碧檻俯隴沙黃自愧乘輶傳虔來奉
辦香負才異英衛修道慕韓王杳忽精神接徘徊意氣
揚鴻濛果誰始吾欲問雲將

譚文卿前輩

鍾麟

招飲節署奉贈

終南山色抱城來持節元戎幕府開舊疏威嚴真御史
高牙輝映大行臺西陲轉餉紆籌筆東閣論詩快舉杯

此去坦平歌蜀道甘棠應爲召公栽
中丞暨李荔友軍門近修治北棧行之

咸陽客舍題壁

東流渭水日增波駐馬平原喚奈何
三輔形模關塞似九原魂魄帝王多
不堪冷水徒飛雁憶過行宮半臥駝
好趁新豐來貰醉拍翻銅斗助高歌

馬嵬

蛾眉不幸寵深宮邊患羣將罪女戎
遇比戚虞應更慘罪疑褒姒豈真同
三生已負牽牛約一死猶成汗馬功
爲語唐陵俱寂寞不徒荒冢夕陽紅

觀音堂

我從寶雞縣已見羣峯屯遂緣磴麓過直泝沮水源積
溜不橫走觸石因成喧潛聲泄雪竇裂響轟雷門直視
碧潭暗稍畏青峯翻停觀未容駐單弱勞片魂居人築
板屋激碓連近村膏腴藉溉畝汲濯兼灌園喜見西北
地稍知水利尊何當獲召杜勸課蘇黎元

過大散關

陳倉驛口四山圍且喜清時戰鼓稀行過散關曾不覺
蕭蕭黃葉點征衣

鳳嶺

言登鳳皇嶺不見鳳皇臺惟餘鳳窠在塊塤飛黃埃小
亭壓雲際直立羣山隈仰穿覺日隘俯瞰聞風來平生
恣遐眺此地真豪哉揮手蕩八極注目驚九垓但疑襟
舄下迤邐千峯開萬象入懷抱鬱結爭崔嵬黃鵠遠堪
跨丹鳳呼可回帝閭儻遙接吾欲凌蓬萊

南天門

青天斜一面側避萬峯生複疊彌多態嶙峋不肯平雷
霆巖底蟄日月淵中行獨立看形勝因之見古情

心紅峽

攀崖喜放晴入峽忽失晝崇巖高翔標峭壁炳鋪繡媚

花綴蘋妍虛蘚瀟綠透昏霾徵古胚貳費錯新鏤側身
窮下趨琴瑟放清溜注溪流玉膏殷壑夏金奏氣積積
霧陰響挾忿雷鬪遙從澗底窺萬笏倒晴岫正如豪士
文怪偉出幽秀愁因佳趣破景惜去程驟大哉乾坤奇
位置信神構

紫柏山留侯祠

博浪藏名爲報仇攀鱗附翼起中州椎秦力士知何在
不共樊滕作徹侯

山河草草一棋枰何事仙家預戰爭儻使安期從項羽
未知垓下孰輸贏

指顧三秦逐鹿雄又傳帷幄定儲功絕憐四皓長安葬
讓爾逍遙訪赤松

辟穀遺方信可憑人言白日此飛昇駐顏丹藥餘多少
惜未相逢漢茂陵

陰謀遭忌果非誣再世豚兒國已除却怪有人稱酷吏
貂蟬七葉冠西都

穀城黃石舊蹤湮誰悟韜鈴變化神一卷素書今尚在
談兵容易誤儒巾

觀音碣

山行真好奇側步入澗底懸澗千丈高斜趨不知里青

濛濛氣濃黑拒日光死大石疑囓人岌岌怒相睨剗空
眞迴腸剗末若鋸齒谷深殘葉驕壑盡石梁踣陲聞萬
弩喧澎湃海聲起細視出石間鏘洋互盈耳探奇得幽
深百念雜悲喜何當築團焦聽此辭辭水

雞頭關

耳聞叱號聲目眩窮劣色此身浩無依騰上已千尺百
盤踏空轉一綫入雲直憑虛疑構梯憩倦劇倚壁固應
攀陟能天巧勝人力蹲身坐關門八荒據巔脊信知兒
維高稍恐坤軸側是時仲冬交落日滿山赤正愁涂路
艱陡見田畝闢道徑似康莊去來紛若織樵唱晚相逢

農歌競終夕忽憶龍戰時萬夫曾倒戟

寬川鋪

看山宜遠眺近接翻少奇佳哉兩石峽直上高險巖羣
峯正何似一抹青烟垂偶承旭日映紫翠紛蔽虧澗旁
澗窈曲峯外峯合離密聚稚松長澹舍空蘚滋攀援自
發興一往無前期慨然忽感觸頓起鄉園思西樵秀窈
窕湏峽高逶迤還山定何日毋被猿鶴嗤

柳池驛

奇峰天半落化作萬年松一路雜紅葉參差瓊瑤濃
烟迷去騎夏雨嘯寒鐘羨殺樵童逸無因荷笠從

詠園中草木

蜀中多古柏壽者常千年昨行劍州道曲幹森連蜷
搖雅黎雨噓拂秦漢烟誰知署衙內亦有青蓋圓流膏
滿癭節厥質凝且堅棟梁雖未任已覺形神全懷哉日
灌溉望汝能參天

柏

空庭修竹旁錯雜種嘉植忽逢九英妃窈窕逞顏色微
風時一吹香氣溢几席邇來漸飄墜碎瓣紛可惜陡憶
種花人辦裝已行役

謂張香濤前輩

驅車入并門噤瘁不遑息

人生若飊輪盛會正難植惟當倚花前爛醉倒巾幘

梅

幽桂最芳烈百卉誰與京婆娑綠陰滿散馥盈中庭凡

鳥不敢戲丹鳳銜其英爾實炎州產移植因滋榮相期
耐歲晏辣性常堅貞

桂

金橘亦橘類毓德生遐方輕盈似韓彈徑寸圓且長臨
風試撚鬚三日懷袖香嘗聞貢包匭自昔推淮揚蜀珍
苦僻遠未得登瑤筐何嘗遞拂拭羞芼來玉堂

金橘

閩蘭挺而修蜀蘭矮而大正如洛陽花姚魏各稱最日
暮倚曲檐采摘遂盈佩珍重瓊異姿亭亭出荒穢莫如

金玉場鬪蘭逐高會

上海賈兒近日喜
爲鬪蘭會

蘭

海棠固蜀產豔質何鮮妍匪惟骨幹挺兼以文采宣紅
英綴颯繩煥若山櫻然何哉杜陵外曠古無佳篇乃知

託質美亦賴詩人傳詠梅詔何遜賞菊誇陶淵不然廢

山谷朽死誰復憐

海棠

昔聞江陵守勁節懷自持木奴種洲上千載垂清規
緊我處劇地不能潤膏脂殊恩已過分澹泊奚敢辭
尙無一畝產安望千戶貲人言我才拙自揣良亦疑
願惟歲寒節猶有霜雪知清貧勉自守勿逐淮北移

橘柚

蠟梅古未聞著詠始北宋種遺爾雅書編軼楚人
頌知名雖復遲一出乃驚眾却笑蓬蒿紛紛詎足重
宵來雪花寒皸瘕忍饑凍欲補三友圖聯盟與君共

蠟梅

紫荊本同根側出乃殊幹正如昆弟歡蹤迹易分散昨

接南溟書噪鵲正檐畔知我卯君來崎嶇汧襄漢懸應
花下談笑釀倒青案他時贈歸人折取試攀玩

紫荊

京師本無竹一筍已絕奇近來厥審裏亦有琅玕枝固
知地氣異已逐南北移去年種雙堦繞砌羅參差喜從
千里外復見鸞尾垂嫵媚更搖曳澹若空靄滋惜無二
三子把袂相追隨

謂陳天如呂
冕士兩前輩

微吟試擁鼻悵望懷良

知竹

春風幾時來吹我小園裏曉行看桃花冷蕊已先起
籬籬低復斜紫萼垂垂斐亶遂令冷官衙倏忽頓豪侈宛如
石季倫錦障覆世里寄言牧令流供張勞未已不如種

名花鋪地盡羅綺

桃

直木本先拔韜采良獨難君看椶櫚樹寒產干雲端有
材資世用豈免斤斧殘眷茲百尺蔭寄我庭宇寬託根
諒得所昕夕偕盤桓古來賢達士伏處恆泥蟠

椶

昔泛洞庭櫂潑墨雲模糊長颺翼飛旋急雨如箭驕繁
聲戰梧柏密響翻菰蒲雷風入呼竅九域隨挾驅邇來
走塵土清景難追摹君山渺何處搔首心煩紆侵晨坐
窗外逸興來江湖但聞萬點細錯落跳明珠

芭蕉

盧橘實嘉植比美惟荔支中庭兩株秀質奪包山奇隆
冬尙含綠大業垂禰裊惜哉佳劍外半逐追鋒馳轉蓬

困南北擾擾隨喧卑雖然署中產不見珠寶垂何況憶
蓴菜鄉味空懷思

盧橘

種梓望作瑟種桐望作琴如何方寸內却抱千古心微
生性懷卞遠慮非所任愛茲畫簾外濃綠搖清陰公餘
獲暇暑散髮依空林何須逐熱客刺促勞冠簪

梧桐

粵中多茶花高者僅盈尺偉茲修幹奇吐焰半天赤陰
陽爲大爐鑄此豔姹色朱槿信匪倫戎葵諒非敵生才
何必多習見稀愛惜移根向柵頭價已兼金值

山茶

茲草生階前離離可人意幸蒙顧盼恩一抹蔚蒼翠昨
宵江雨來纖葉益明媚想見田野閒秔稌接天際我無

調燮權繫念切農事比年三輔災所望獲豐歲感物遂
興懷私衷幾時遂

階前草

鑿石作方沼徧種蓮花繁盈盈紫蒨茁冉冉青葢翻雖
無千丈藕花大如玉盆鞞紅兩三朶晃瀼搖朝暎坐憶
半塘路先人有遺園清池徧菡萏高會羅琴尊田廬久
易主往事難具論歸耕及早歲母戀黃紬溫

蓮

汴梁懷古

汴州城外水湯湯縣互金隄百里長星紀尙沿商大火
名藩曾溯漢睢陽於今詞客都能賦可有奇才或賣漿
祇是登臨增感慨莫從朱趙話興亡

青齊懷古

泱泱表海舊封圻九伐猶傳霸主威
筦仲相持奇績著田橫亡後逸才稀
高臺故鼎埋芳草廢殿哀蟬噪夕暉
七十二君何處問卽今秦碣舊題非

晉陽懷古

中原慘淡鬪龍蛇崛起并汾自世家
百戰奇功符赤帝一朝結局付朱耶
君臣穢瀆原堪議將相勳名要足誇
莫問舊時龍起處蕭條晉水夕陽斜

平涼懷古

拓邊無計剩防秋重戍金城戰不休
衛霍窮兵終下策

范韓開府乏良謀旌旗隴水兼湟水絃管甘州又石州
不審賀蘭山上路幾人磨盾姓名留

豫章懷古

章貢寒潮兩派分女墻高聳八層雲南州耆舊徐高士
上界神仙許隱君說劍豐城餘黯氣攜樽滕閣憶鴻文
獨憐楊萬銜鬚地點點寒鴉下夕曛

錢唐懷古

吳顛越蹶梁陳燼豈有南遷足久憑桂子荷花開創局
靈芝瑞木說中興班師遽已催羣帥灑淚何曾憶七陵
若比婆留應遠遜試看湖廟尚峻嶒

粵中懷古

九州南望地形窮險鑿梅關一線通高鐸曾來文教啓
佗巖偏據霸圖雄綠榕驛暗鶻唬雨黃木灣高鯉拜風
爭羨珠犀蠻貨聚更誰厝火策平戎

閩中懷古

禹王明德果千年遺裔猶開赤嶠天甌越鄰封秦郡縣
汴杭殘局宋山川從來地險巉巖跼且喜人文理學傳
欲趁幔亭高會夜驂鸞同訪武夷仙

滇中懷古

昆明竟鑿定誰功洱海蒼山一萬重黑水源流遺禹貢

烏蠻疆域限唐封已無祥瑞徵神馬尙有威靈懾臥龍
底事畫河誇玉斧卽今弦誦接巴賓

黔中懷古

秦郡黔中早著名又從黎播關榛荆弓刀小隊諸蠻社
旗鼓行臺大將營絕徼邊防通猱狔累朝人物始元明
飛雲峯上聊高望一髮中原夕照平

眉州謁三蘇祠八首

八歲誦蘇策十歲吟蘇詩侵尋今廿載鞠脰瞻崇祠有
池盛蒲葦竹樹連參差中庭兩榆柏貌古青離離何哉
櫻黨禍不作還鄉思想應池館勝未必如今時滄桑閱

幾變魂魄當樂茲薦公戎州荔酹公玻瓈后恨無紫裘
遂一向高樓吹

中楹祀文安兩蘇同夾時祀多賢孫濟濟咸後起要
惟根柢深實自老泉始譬如輪囷材枝葉庇十里餘氣
茁槎枒頭角尙鬚鬚而汎流澤長遺蔭及桑梓詩才數
程唐史學推王李孰非岷江源分此一勺水寄語後來
人勿誇門第美孟晉宜迨羣努力紹前軌

文章無他巧妙處惟一真性情有獨到萬古留其神髯
翁固人傑聲譽馳海濱談諧及嘲謔所得仍深醇奈何
耳食輩競效西施顰末流苦泛濫斯道多荆榛我嘗誦

公作頗恥隨公塵吸精自遺貌壁壘期翻新私懷未敢
說恐復驚時人涓流縱淺薄冀到滄溟津

築隄禦徐災濬湖備浙害長公本文人治郡乃稱最子
由諫青苗議論何雄快儻令坐廟堂豈減富韓輩南冠
抵災荒九死禦魑魅章蔡何足尤信信本輕吠獨怪紫
陽公百年猶芥蒂甘尋蜀黨仇反貴舒王罪謬加雜學
名所見毋乃隘

振策出叢篠方沼清而幽倚廊讀遺墨望古行夷猶馬
券最奇崛筆力如掀蚪羅池有碑碣水調留歌謳零星
數簡札珍比琅玕璆鑱盡俗手豈免寒隸羞抑聞古

士寓物曾不留大千盡泡幻誰絀復誰優區區辨妍醜母乃刻舟求威鳳自高舉鳥雀徒啾啾

昨游眉州城蠶市已逾月孤城似山村遠望綠苗發比屋聽紡繰連畦事耕墾眉俗原近古此事長公說更喜膠序徒秉志勵修潔不染塵垢污錚錚想寒餓鄙人本薄材衡鑒謬持節尚冀民俗良清閑補疎拙未能挽狂瀾悵望媿前喆

眉州土習愿
樸弊竇較稀

二蘇昔射策先後臺閣翔聯牀約聽雨蹤蹟殊參商一從坐詩案遂絕鴻雁行儋雷隔百里覲面惟炎荒我今攜弱弟翼聳升公堂遙知勝頰汝宦迹隨分張酒酣望

嶺嶠極目天蒼涼惜無伯仲輩共此壺與觴且未
易況復歡會長浮雲豈終返缺月難久光人事有錯迕
睽隔遙相望

我家南海湄是公舊游地平時本部民到此或應異想
見騎鶴還舉杯定當醉忽憶寶陀山破壁贖遺字他時
投檄歸蓑笠辦生計遙應借佛龕丈室闢深邃旣償望
古心且慰平居志此策我已成無須大江誓

凌雲山五詠

大佛閣

前身本臥龍事佛得神力却笑李衛公焚經遭貶謫

爾雅臺

景純未游蜀附會笑圖經樸學西京盛無人識姓名

治易洞

吳琬讀易處

先天本無易妙處豈言宣滿壁乾坤畫祇疑第二門

洗墨池

至人遺其形神蹟乃千載至今巖石傍墨丸聞尙在

清音亭

清音終日到遺像玉龕留試問驂鸞返黃州定惠州

游凌雲山

昔聞謫仙子載酒凌雲游詩魂一去幾百載尙見泉鍾

石聳山幽幽我來始放棹江水平如油危磯峭復削磴
道頽而修荒痕蘚苔剝古色椶梧稠延緣竹樹裏急響
鳴颼颼風聲水聲石聲互撞激似爲詩客洗滌開塵眸
稍入至寺門檜柏羅四周猙獰異像立泱泱神香浮丹
青錯交絢金碧勞漆髹垂檐舞鍍鳳畫桷棲神虬琅琅
鐘魚戛清晝隱隱梵吹鳴高秋平生敬佛罕參佛但覺
耳目攝靜精神適再上清音亭夾道多松楸深巖鑿戶
牖激瀑鏗鐘球攀援苦未已佳景欣漸收平臺聳登忽
揮手萬里送到滄江流不知詩人方寸定何物似欲揮
斤八極吞九州尙嫌俗骨未輕舉不爾鞭鸞笞鳳使與

飛仙儔遙望沫江前葉葉飛輕舟棹歌競來往艣唱紛
夷猶當年坡仙到此不歸隱何況名韁利鎖幾輩能自
休人生彈指若吹網誰爲跼蹐誰夷由但逢山水便當
醉塊塤一洗平生憂君不見寺前大佛臨江頭當時物
力窮雕鏤賣兒貼婦千家愁營建未畢來戈矛至今矗
立似沙洲豈如我曹一醉足千古要與山石磊磊俱長
留

羊城大水歌

昨接南中舍弟書知我鄉園近消息滇陽江決隄障崩
平地水深凡幾尺東官花縣城本高昨者初旬浸尤劇

屍骸簸盪浮村原魚鼈騎盈上阡陌廣州近歲差太平
小寇時時尚充斥不愁剽掠愁灾祥却運遷流竟何極
仰天高叫排帝閭廿年醜類窺中原川東滇南又合市
處處窟穴憑鱷鯢王公守國重設險豈有九域無屏藩
水爲陰物古所歎洪範五行書俱存譏祥迭至正爲此
霧雨瞋晦虹蜺昏安得雷公挾力士湏洞一洗開乾坤
東南乾溢總不歎皞皞擊壤歌黎元我慙竊祿備史館
夙夜憂國心煩冤頗疑偏灾尙未已天聽高遠難具論
君看劍南別苦旱日月炎熱愁曦暎

復有

復有連州信饑蛟拔地回高城深沒水急峽怒翻雷
霧騰騰上魚雲淦淦來下游應槍攘百丈巨隄開

極目浚湍縣茫茫似浸湖黃泉都待斃赤子竟何辜
恤姚崇策流亡鄭俠圖叩闕吾欲問劫運幾時蘇

不意崇朝耳奔流到廣州餘腥風雨泣積冷鬼神愁
石防潮急壅蓬禦颶周兼旬三被浸誰切徒薪謀

閩晉連遭歉皆蒙雨露偏殊方何阻隔飛奏獨遲延
盜戒防偵伺蒼黎劇倒懸承聞驄馬客封事達

堯天

時鄧小赤侍
御最先入奏

茅峽

江行忽晝陰，覲面呀石壁。窾影陷日深，長標掩天直。風
來易停留，水懦反衝激。斜彎垂鼃臙，碎點駁龍脊。中流
助滌洄，孕此一拳碧。旖旎插巖葩，鬢鬢垂洞柏。嶙峋駢
怪形，幽秀逞新色。俗傳大茅君，駐鼎煉丹液。荒唐笑羽
流，附會編圖籍。山川誠自佳，何必託仙迹。不如挽江流，
盡作天池墨。臨崖試濡毫，四顧動霹靂。

山行

新霜昨夜染晴空，柿葉青濃柏葉紅。愛殺南宗圖畫好，
不知身在亂山中。

牛鼻箬

朝寒霜氣濃戒旦始蓐食出門馬已驚懍懍山勢逼高
峯橫我前仰面不容覲惟見前驅人累疊挂絕壁怪茲
絕攀躋何以生羽翼及循石徑行窄狹僅容隙微生拚
直前置蕩俯千尺凝神畏下窺轉步輒欲側萬夫齊奮
呼百里陡辟易却從峯頂旁創境得新闢山峯繞重重
田畛開歷歷履險纔得安坦塗愈知惕勿云道路難終
復勝行役不見輿前夫頽肩未遑息

酉陽

客行酉陽道山谷多參差大宮及小霍戢戢刀劍垂竟
日無百家牖戶皆湫卑居人似鹿豕面目青且黧積潦

道旁滿涇薪竈頭炊誰知供帳至水陸窮珍奇嘉饌備
百品醇酎羅千卮此邦議分試實始嘉道時鹺商有帑
息驛遞皆取資侵尋迫冊載鹺滯帑亦虧籌謀及夫馬
權算精毫釐我曹偶飲啄大半民膏脂糗糧十日備珍
錯千里攜忍貪列鼎味難禁臨觴悲邇來稍變制似欲
憐瘡痍顧惟縣尹輩各自營其私豈能供過客坐使囊
橐糜將毋藉民力挹彼方注茲昨者赤幘隸擾擾閭里
馳盃盤並要索負販多嗟咨我來謂驛吏急遽將何爲
官人性澹泊蔬糲期充饑驛吏長跼告供億理亦宜雞
豬及魚蒜一一有定規前官縱豁免後官仍責迫不如

仿舊貫法立令亦隨嗚呼長民吏岌岌冠若箕作事慎
謀始勿使民力疲民疲尙自可走死傷流離近者合州
道商賈散無遺焚燒及稅廠盜賊乘恣雖蜀民豈盡悍
激衅由有司地利縱饒沃亦有悍與嫠誰歟法桑孔尙
復窮刀錐驛使言止此傾耳垂涕演拂袖出門去颯沓
寒風吹西陽州本附重慶棚考試自道光初年始議分
棚至今供億糜費重爲民累然已不可再改復
矣合州事聞吳
地山州牧說

梅子關

亭亭梅子關仄徑伏邏迤高峽已刺天上天猶未止徐
捫雲頂行延袤又數里顧視萬峰攢蹙翻如潑水前驅

赴壑蛇後騎旋磨蟻萬聲助呶呼竭蹶爭寸趾失足卽
崩崖巨綆亦難恃乃悟修學功斷從艱苦始出險望層
巖鬚鬚勢橫恃轉嫌精力疲未暇層折紀幸無荆棘途
跬步慎徐履

桂子崖

登嶺已出險曠然心境融況茲林壑美佳氣常鬱蔥青
山凡幾疊景變情則同叢叢若睥睨外廓而裏空潏然
篳篠翳不使一覽窮有時戲山頂反在羣木中璘煊紺
黃采晃瀟金碧叢依稀露拳石剔透紋理工平生蓄幽
志徧覽山水雄及茲覲良覲去旃殊匆匆人事苦參錯

嘉禾堂詩金卷七
五
孰能嘉願從不如野人輩結宇依層峯

小雨

愛看畫景愛裁詩
籃筍衝泥滑不辭夢醒雨來聞浙瀝
却驚花埭打篷時

雨過青桐坪

溼雲抱春岑桂弱不依地迴颿吹未開已作飛雨至
濛濛天際來灑潤在衣袂萬流交迸黃千樹羃靄翠前峯
更縹緲偃仰若橫睡陰濃兼霧寒涼過聞葉墜反從困
頓中散朗愜幽意遙見山鳥飛拍拍爭洗翹人勞物自
閑彼此孰矜貴毋爲羨三旌晞髮且忘世

水田壩十二韻

樹杪萬峯懸人行繞樹邊撥雲橫度約躡澗倒聽泉石
作高低抱山兼向背園紅蒸楓爛漫翠夏竹嫵媚混沌
知誰鑿玲瓏却自然巖飄仙乳滑雲護佛鬢鮮淺瀨疑
爭地微烟便倒天奇峯生馬外青靄落鷗前更喜千層
曲都開百頃田平畦深沒鶴荒隴靜呼犍此地非箕穎
其人邁偃佺卜耕原未易聊爲駐吟韉

二酉山藏書石室歌爲州牧李郡侯同年

承鄴作

古人嗜古矜縹緗書卷盡向名山藏西河石室始卜夏
雙趺引起何渺茫史公南游亦爲此遂探禹穴浮熊湘

扶風馬融蜀文黨往往故蹟輿圖詳當時壽世少梨棗
愛護恐復纏風霜星鈔露纂太勞頓猶竭精力收散亡
豈如後世趨簡易但侈細字儲巾箱西陽自昔蠻夷地
割置從來隸荒裔巋然高嶺接龍池下有深崖杳幽邃
長松十丈魁且梧雜以山花紫紅翠水簾一斗飛珠璣
屈注田圩作鳴籟居人架屋傍巖隈壽過期黎竟忘歲
傳聞太古有藏書剝落莓苔竟誰記蜀中詞藻天下無
井絡上應文明區邇來頗復事刀筆樸學一變成榛蕪
卓羅程鄭世豈乏第解權算窮錙銖只聞量谷粟萬斛
罕復插架書千廚君不見姚觀察謂歸安姚君不見吳

尚書

謂時昭吳仲宣制府

校刊古籍刪魯魚學士始復知五車英

才領袖亦多有窺步涉奧方權輿我慚朽鈍謬持節欲
挽溟渤來歸墟才疎汲短實多疚有媿列鼎兼吹竽伯
陽之孫近良牧政比龔黃更神速試儲玉軸三萬籤局
鑰緘滕閔空谷遠同王阮近錢毛盡與章縫供諷讀長
恩世守久勿渝光耀璧奎騰儵煜文章樹木旌節花科
第聯翩冠西蜀中和作頌侯他時衮衮諸生如立鵠懸
知舊俗洗杯棹勿學屠蘇建高屋

酉陽教民最多爲蜀中大患故及之

贈馮壺川學博

世瀛

早賦還山解組回故園松菊手親栽年齡已復過商皓

著作如今比蜀才
自署支離藜杖倚
徐澆塊壘酒尊開
絕憐桃李新陰盛
半沐韓門化雨來

擬東坡書韓幹牧馬圖

以下十三題尊經書院課士擬作

古來畫馬推曹韓
曹霸遺墨今見難
韓生下筆何嶮巇
奉詔洒翰彤庭端
圖中萬匹如雲屯
蹴踏便恐風霆翻
紫黃赤白種類繁
亦有鐵驥兼驅駟
想當華清賜浴還
霓裳合樂超廣寒
登牀妙舞紛盤旋
皓齒一笑御顏歡
豈知運盡財力彈
朽索不救奔蹏患
豬龍踐踏來天閑
青騾一去何蹒跚
西來棧道踰賓蠻
此時廐馬何足奔
無乃翦烙供蕃汗
古來有國懲游盤
茲實炯戒非誕謾

朝中駑驥方爭喧縱有萬騎安足論千年陵谷圖尙存
似作殷鑒貽後昆嗟哉備位多義冠更無諫獵陳金鑾
擬杜五律

天河

人間傳弱水天上卽銀河風浪長如此神仙不敢過渡
雲低玉葉浸月湧金波欲附靈槎去迢迢奈若何

初月

初月如殘月纖纖一握痕自然流影遠只是託身尊掩
映同星小輕盈畏浪翻光芒終有待會見激乾坤

薈劍

此物出蕃舶提攜千里輕春冰腰下見秋水掌中擎盛
世仍懷遠偏隅望整兵安能農器鑄耕鑿教編氓

螢火

秋意入南國先從林際生一陰纔鼓盪數點自分明過
雨見開闔隨風低送迎機心妨捉撲休更傍簾旌

促織

汝質甚微細驍騰真絕倫風霜方殺氣巖穴且藏身健
門如奇士長鳴亦恨人終懷山野性莫向玉籠馴

歸燕

豈不懷高尙其如戀主何忽辭梁棟去爲避雪霜多素

剪罷衝雨紅襟仍浴波有人羈遠域歲晚尙蹉跎

除架

滿架碧條弱濃陰相蔽虧迴飆今已至障翳不多時利
器得在手芟除休更遲須同除惡盡勿使舊根滋

苦竹

世味尙甜俗獨茲懷苦心菲材甘澹落晚節自寄峯丹
鳳諒羞啄青蟲時見尋物微須護惜灌溉望成陰

廢畦

秋穫已將罷褰衣還步園摧殘憐地力滋灌只天恩鹿
走穿叢過蟲乾抱葉繁昨宵餘雪在一寸積籬根

病馬

汝亦遠行者長鳴洵可悲九州曾迹徧百戰尙身隨
蹇自憐瘦禁寒應苦饑識途終致用會有報恩時

蒹葭

蒹葭似漁父寄迹在滄洲桂弱憐微質蕭疎易白頭
葉疎稀宿鳥根淺礙行舟應有蘆中客蒼茫不可求

銅瓶

冶鑄始何代迴非時世妝沈埋偕瓦甓剝落閱風霜
痕帶舊泥凍味宜甘井涼邇來機汲巧見汝棄銀牀

雨中由黃草坪過武陵山

涉想登靈峯昏旦忽移景飛黔失寸暉晦色惑諸嶺賈
勇循澗崖筍屨任馳騁風霆浩嘯翻草樹逞妍靚陡緣
萬松巔趨下若窺井一諾許山靈顛踣吾有命嫫媿趁
蒙茸暗昧露光炯絕幽一巖穿造極萬峯迸却乘艱阻
嘗喜得妄耶屏險中博歡娛事過趣彌永軒冕有危機
何者真樂境平生游屐多屈指半天幸山中難久留浩
歌下蘿徑

過二峯關積雪皓然用東坡聚星堂韻

憶昔章江浮片葉萬點驚毛糝飛雪試登南浦望西山
洞壑棱棱詫奇絕今年持節出岷峨險過羊腸經九折

頓疑百丈玉龍橫坐看羣峯飛鳥滅陳蹤俛仰凡五年
眨眼飄輪真電掣近聞川北方議賑已見官緡頒紫纈
關東詎復嘗肉糜河內應同齒糠屑侵晨玉女忽作戲
縞帶銀杯舞飄瞥裏飯休嗟行路難滿篝喜聽農人說
擁裘當念無褐人莫厭被棱寒似鐵

幼弟談及山路之險詩以慰之仍疊前韻

我生飄泊等萍葉未慣淩波耐霜雪境如曼倩果窮哉
愁似長康更癡絕叨居華秩愧才短幸免微官歎腰折
飽聞西蜀山水幽萬壑千巖橫沒滅銜恩喜佩銅虎行
作勢欣看玉龍掣泥塗蹉跎何足歎正好微吟擁裘纈

比來世路更崎嶇毒過銀砒與金屑含沙蹤迹本細微
伏弩機鋒驟橫警人心山石誰險巖比較思量休待說
但須撥遣題新詩急注麝煤研紫鐵

與幼弟圍爐小酌感念身世慨然成詠三疊韻

夜來煖酒燒紅葉蟹眼湯浮如沃雪埋頭一臥愁未能
輒腳三杯且閒絕舊游重憶真耳鳴世味飽嘗似肱折
自矜酬酢近圓通豈謂悲嘆互生滅邇來學得養生法
勿受天公相搏掣任從濁水污塵垢漫羨浮雲噓綵纈
瘡聾世上足往來噉跡途中甘潔屑紀元章菰雖萬年
夢幻電泡纔一瞥但應念念如死灰庶免譏嘲騰口說

君看堆雪滿巖隈
頃刻消融如炙鐵

連日稍晴聞攢天舖等處有積冰沮洳特甚四

前韻

昨日晴雲開玉葉已見寒威減積雪豈知冰雹猶滿山
又挽軒輦上巉絕蹈塵但覺馬蹏圓墜溼眞愁烏足折
自嗟命運本乖違久已豪懷盡消滅牢愁總歎眉莫伸
舉動先妨肘頻掣偶然行路亦艱辛倏忽晴光消綵纈
千條竹戛堆玉英五鬣松低舞銀屑蠡旋谷口苦傾仄
猱上巖巔倏飄瞥敢云磨礪出英豪藉慰窮途姑妄
遙思今夜月溪村橫笛何人吹繡鐵

日來酷思鄉物之美頗動歸思五疊前韻

颯颯迴風驚落葉吹墮檐前似吹雪打門淅瀝正蕭然
綴樹零星歎奇絕坐看石岸草全枯恨少隴頭梅可折
忽思五嶺炎州外陰火潛然長不滅烹鱸縷膾金碗擎
割炙行鮮寶刀掣芋蔬登陸餘土紅橙橘垂林綴霜纈
宦遊爭喜說歸田強半空談但霏屑終教皓雪滿鬢髻
幾見急流退飄瞥離官寸步應自佳諺語久傳晉人說
安能低首學驂駒消盡雄心踏蹠鐵

途中懷故園兄弟六疊前韻

與君託體同根葉聚首鄉園幾霜雪君如子朗誠最多

我亦季常稱秀絕何因浪迹各蓬飄只爲春官曾桂折
新愁似水漲難消舊事如香灰不滅羨君邑里騎款段
不受名韉共牽掣飽嘗臘酒勝屠蘇準備春盤堆綵繢
銜杯可憶遠游人耐冷餐氈嚙銀屑困如踏磨蹇驢行
忙過投林飛鳥瞥却欣把盞同卯君舊事聯牀堪共說
何當丙舍同卜耕春雨掀泥一犁鐵

過菖蒲山雪景奇絕平生所未見也七疊前韻

濛濛縞素鋪林葉非霧非霜亦非雪冰稜三尺高於山
樹裏看山更奇絕氣濛日月色沈霾勢壓峯巒狀摧折
拳毛牛馬已全縮振翼蝗蝻欣盡滅我疑天公戲作繪

畫幀平鋪初映掣樓臺潔淨纔鋪粉巖壑纖濃未施纈
平岡龍尾拖宛延遠樹牛尾皴瑣屑却從淡遠更傳神
數點寒鴉去飄瞥郭熙小景應難比馬遠山殘安足說
遙知添我畫中人策蹇梅邊拗虬鐵

樵子

負笠已幾載翛然雙鬢皤采來奇幹富閱徧險途多赤
手除荆棘抽身反薜蘿不知塵俗擾猶唱葛懷歌

大霧由牛鼻箐口下山遂復見日

上峯猶屯雲下峯已開霽我來過峯巔登頓苦迢遞儼
儼寒飈號漠漠急雨細微寒動成塵餘潤白濺袂竦身

投徑坳却顧仰天際翻訝昨來時懸空未依地羣山誠
自好極目眇蒙昧奈何千丈高甘受外緣蔽熒惑固自
多驅除亦非易待埽昏霾開豁朗駐軒轡

送于晦若上舍

式枚還粵

于君古豪士逸藻鏗蘭鯨腰腹無十圍萬卷相支撐沈
酣過孝緒博洽逾遵明讀書若貫串吸髓而挾精昨年
罷秋試遠作西川行岷江萬里瀉太華千丈傾驅馳入
筆底隱起何崢嶸雄談資滂沛不顧俗眼驚君也固粵
產實本西蜀英不圖馬楊後見此才縱橫又能達治體
談笑風雲生肫誠見交態曲折知人情侵晨苦告別髮

髮揚旌旌臨觴轉悶默欲語心忪忪君歸南海上笑傲

波濤聲此邦縫掖士車笠多舊盟陳侯孝直最豪宕才調

何觥觥陶

春海王

峻

富經術梁

庾生

鄭王

饒詩名二林

楊伯明仲

近傑出武庫森甲兵相逢爲問訊久別情緒縈丈夫志

千古豈以窮達爭山堂共砥礪著述何時成嗟余最鶩

鈍浩蕩浮雲征異時君射策我亦歸蓬瀛遙知領羣彥

雅奏賡韶謫延津會當合丹穴無獨鳴執鞭願陪侍排

日研都京

灤西杜少陵祠

飯顆山頭一老樵麻鞋西走鬢飄蕭朝班斷夢鴛鴦隔

峽戶容身虎豹驕，儻使功勳同郭令。
並教宗社復神堯，凌烟甲第終塵土。
未抵詩名萬古昭。

泊辛家灘

悔將詞賦博戎冠，輾輾馳驅蜀道難。
不共清明登冢去，雨涼今夜宿辛灘。

輓袁筱塢侍郎前輩

葆恆

先朝開府重睢陽，再世勲名檠戟光。
容止威嚴瞻短李，鬚眉怒磔似髯長。
何期玉節方銜

詔遽見金刀，早掩銚我爲蒼生同洒淚。
不徒私議感銜

觴

丙子歲余奉使入蜀公折柬相招始得接風采

病中劉瑤齋太守

廷植

以鹿角膠見貽賦此奉謝

劉侯循吏今代無日來贈我斑龍珠李公鹿脯不足比
右軍裹鮓應絕殊蜀中麝麝亦常產體質薄陋徒區區
瀋陽遼左毓王氣五陵蔥鬱環

帝都偶然物產盡靈瑞

累朝帝澤深涵濡昔年木蘭歲秋獮御槍萬隊圍場呼
邇來盛典縱停罷打牲尚有材官奴似聞鴨綠近海處
洲島錯壤紛縈紆強鄰耽耽日窺伺休養歲久生羆貙
敵讎未雪壯士恥中夜看劍長嗟吁祝君鹿轡早乘駕
破虜旋佩銅虎符行將祿福徧天下埽靖獯鬻誅昆吾

穹廬萬里淨於洗凱唱歸宴狼居胥我雖疲備百無用
尙解草檄夸平胡歎瓜戩艾勿復歎共飲麀血精神粗

寄家書

寄書常帶淚況乃病愁多意重翻留滯詞繁易錯訛按
程稽驛堠託夢共風波屢說還家好田園計若何

初食熊掌

食經數八珍品彙錯瓊瑋猩脣及駝峯形狀半難紀惟
有熊掌多取給易求市侵晨剝啄來喜氣動雙指陡見
玉掌盛堆盤滑甘髓初食殊攢眉污穢雜泥滓稍復頓
頓嘗含酸噓未已淋漉餘石灰蜚腥膻刀匕正如才士

名虛譽半難恃又如顰西施示病常齟齬七鑽同養龜
三嗅類嘗雉子輿本北人謬將魚共比豈知雪鱸肥遠
勝霜蹠美軒輊信陳編耳食吾益恥忽憶大海南從從
育魴鯉五載未還鄉荒園沒蘆葦稽首謝江神誓言今
在耳去矣辦笊簍湖釣秋水

九月十六日龍安試畢王蓮塘太守

祖源

招遊寶

圖山登超然亭放歌

飛仙崖畔山幽幽仙人騎鶴今不留玉牀金竈已蕪沒
祇有明月三千秋我來剛氏住廿日風腴卑溼纔半瘳
隱然突兀起方寸欲借佳境開吟眸琅瑯太守今詩伯

曾侍金門隨執戟部中管領得名山萬朶芙蓉插空碧
朝來折柬欣共遊遠岫遙峯看歷歷稍循澗麓上陂陀
旋踏危梯倚層壁山石鄰鄰起相逼奇鬼猙獰錯橫直
人行踏石如踏雲頓覺鬚眉森石色就中最勝超然亭
仰接青雲俯深壑似從天外窺八荒元氣淋漓收不得
罡風忽起鳴佩環山色倏忽虛無閒溼痕颺空霧冉冉
地肺殷動波潺潺此時主客開笑顏我亦急足趨禪關
盡捐妄心息惶怖暫借禪悅娛清閑酒闌高歌爲公舞
願公暫爲山作主亦如此山出雲雨驚毛萬縷鋪大千
化作甘霖潤農圃更爲勒銘向山隄筆底蛇鱗忽撐住

要與此山傳萬古他時椎柘儻有人不數伯都李翕碑兼

季祖

馮巡碑

五瑞圖三熟釜公也兼之成治譜會當濡墨

向山椒作詩寄聞公儻許

太守精金石之學故篇末用以相比

寶圖山後峭壁高削對面一峯形如卓筆去寶圖

山約百餘丈中隔一深澗下臨無底望之震眩

僧人繫鐵絙二條於峯腰中攀援而過計寺僧

三四百人其能緣鐵絙由此峯至彼峯者一二

人而已峯頂有小閣供漢仙人寶子明相傳卽

仙人修煉處僧人晨夕往焚香致禱亦不知甄

瓦材木何從而搬運也僧人云峯後路稍平迤

再行十數里則田疇沃衍時見居人悉非近時
冠服問之云其祖父避張獻忠之亂投墜崖下
幸獲不死因相與誅茅結屋鋤治礲礪久之遂
成村落長子孫矣洞中約五十餘里周圍皆峭
壁不能出入外人亦從未有到者凡桑麻果蔬
紡織陶冶之物取給於山上無不備具惟鹽不
能得僧人偶贈以鹽少許則喜躍如獲異寶或
酬以粟布云其居人無歷日無年歲無頭目除
耕織外一無所知詢以明季鼎革後事及國
朝年號皆茫然不省有太古醇樸之風蓋又一

桃源也王蓮塘太守說

虎口餘生幸獲全
結茅聊復就巖巔
山居未改秦衣服
家具應餘蜀布泉
可有授書黃髮叟
誰爲說劍紫髯仙
桃源自在人間世
不遇淵明莫浪傳

桂湖謁楊升菴祠

如此江山未得歸
却投魑魅竄荒陲
置身科第真無忝
溷迹俳優亦可悲
學異程朱偏崛強
遇同璵璠恥追隨
似聞祠宇忠魂在
夜夜南枝叫子規

得家書知冤士前輩以省親歸里甫登舟歿於旅

舍哀甚殆難爲情作詩二首

短檠竹榻夜三更。噩耗傳來痛失聲。一病憐君先解脫。
九州容我占才名。似聞遺囑期妻子。願得來生作弟兄。
不解淚痕何日駐。卽今東注滿滄瀛。

猶記京華旅食春。連朝步履儼比鄰。圖拈主客詩牌捷。
藥試君臣酒味醇。埋地竟傷王武子。問天難藉屈靈均。
莫言泉路交期盡。夜夜青楓入夢頻。

肩輿行道中作

簿書迷悶甚。客路轉安便。日短疏林外。山欹古驛前。
澄心觀化物。耽詠損高眠。莫厭泥塗苦。擔簦憶往年。

途中寄庾生孝直

岷江蜀嶺皆奇絕惜未題襟與爾期故國釣遊憑入夢
中年哀樂只供詩倦游儻學梁江總偕隱應同晉介推
莫羨太倉容糴米我如朱鳳亦長饑

晚宿榮經縣

宦途只是博長征又向荒山秉燭行陰洞暗棲魑魅影
急灘寒攪雨風聲埤垣險隘都增戍市集蕭條不滿城
安得勸農來召杜課渠礲碓盡深耕

與諸子論詩

讀詩如讀書根柢在學識真實苟未充虛矯難應敵歷
觀古名家林立雖若戟儻能生面開終自據一席毋矜

半聯巧先貴萬卷積咀嚼得英華字字有來歷而於使
事內超脫泯痕迹取材既清新養氣斯浩直化機盡吾
師觸處皆心得吁嗟夸毗徒妄論真耳食謬云天籟鳴
矢口信胸臆絕脰力已疲效顰醜斯極百年風雅替正
氣日衰熄君看技藝成半藉艱苦力豈有捷徑趨而能
千里適所患摹擬工區區限繩尺前明尙選體流弊終
否塞貴能翻白科役人匪人役寄言學詩者多師轉求
益故技須盡捐正途匪難覓砥礪從今始庶面十年璧

又作一首

百年鼎鼎幾詩人得力多緣喫苦辛辨味味中方得髓

出奇奇外別通神妙參肯繁屠牛坦遺盡形骸相馬歟
此是杜韓無等兇莫容餘子翊知津

過大相嶺

茲嶺西南冠青天不得高一峯尊鎖鑰萬岫撼波濤
婦工剝藥巴僮近賣刀似聞邊吏說防戍昔年勞

由大小關至長老寨

看山愛石好遊山憎石奇怪哉此山石利刃攢差差我
行與石避倏忽石又隨連蜷錯殊狀銳削多怪姿從橫
潦潢聚地近行轉遲辛勤劇喘汗寸外不敢窺我思西
南徼雜種同徭夷開通始炎漢諭蜀勞偏師滇鹽獲轉

徒焚馬供驅馳儻無市易利豈敢邊釁滋吾將憇眞宰
勿復生環竒君看葛懷世悶悶長雍熙

越雋澤中雙鶴歌

仙鶴坪有雙鶴相傳已千歲坪以是得名余巡視過見之

越雋澤中雙鶴飛羽毛颯纒三尺肥或云千歲如今威
城郭頓改良足唏邇來歲歉梁稻稀引吭高叫長苦饑
鶴兮汝合青田歸安用低首隨俗韞

道旁見緯夫作

緯夫等人子踏雪荒山陬裹巾應官役奔走同馬牛面
目似崑崙終月不梳頭問渠復何事兩踝窮九州在家
苦長餓一飽須遠遊齟糠幸粗足時有顛墜憂嗟余雖

長吏亦切粢稻謀共居大化內起滅同一漚無田迫求
食貴賤理則侔惟應發惻隱筆撻盡少休勿令背癰赤
呼暑如纍囚

嶺州硯歌爲錢亞村州牧

乃珍作

南榮日煖明朝曦潭潭古屋元雲垂怪哉冬令正藏蟄
何得霧雨涵紛披細看片石氣溫潤一府傳看青玻璃
堅如純鋼濯匕首膩若豐玉凝柔脂憶昨嶺州持使節
萬笏千環堆截薛曉隨蟻攫緣坡陀夜共虎狼爭窟穴
人言此地毓球琳突過青花兼紫鐵吁嗟尤物何處無
蠻徼綠珠更奇絕雀臺之瓦今不聞欽州龍尾誰復珍

端溪老坑今封閉一枚價值論千緡此雖下駟足充用
嘶蹴未減天閑羣惜無清廟生民手負此磊落陶泓君
錢侯錢侯須愛惜神物瓌奇出山澤寶此奚殊卞和璧
要當藏弄等殊珍勿再鑄剝窮物力君不見金生麗江
水玉出藍田山古時瓌寶紛斑斕邇來采取殊復艱但
有劣削兼潺湲乃知造化愛奇物鍾靈毓秀非等閑貪
多求益日雕削地氣潛泄天應慳嗚呼從昔奇才今罕
見豈獨區區一方硯

宿平夷堡聽泉

亂峯圍萬疊何得海潮聲一夜疑箏鼓潺潺直到明怒

衝崖石走寒巃月華生奔入東流去隨人又遠征

登邛崃山絕頂放歌

岷江井絡連天鼓地勢漸下西南傾邛崃一峯獨挺秀
氣壓坤軸高崢嶸不知胚渾定何似凜凜直欲苞元精
旁通巴賈作外蔽中穴猱仡同編氓

國家威靈懾遐邇折筭數載開夷庚金川噶爾悉臣僕
突過元狩兼河平自從道光構海患邊帥怯懦籌金縢
遂令么麼噴腥霧掉尾欲作天池鯨似聞敵境界印度
天雨屢煽修羅兵近鄰西藏若肘掖備患宜凜冰霜萌
他時王師靖輦弼此地更可縻長纆擣虛扼要自兵法

豈但籌海勞經營況今廓夷又入貢金葉奉表輸丹誠
匈奴斷臂有遺法會見絕漠揚旗旌茲山翹峙界滇焚
藉捍戎馬資藩屏行哉路險勿復歎弩力叱馭來長征

宿清溪縣

山形如伏甕山盡已途窮仄徑穿雲直孤城似砦雄吏
行深澗底官住亂雲中想見

皇威震苗蠻被漢風

荔村草堂詩鈔卷第八

南海 譚宗浚 叔裕

使蜀集下 起己卯正月迄庚辰六月詩七十一首

哭幼弟一百四十韻

哭君不成聲百念交軫結自聞噩耗來痛憤蘇復絕如
今淚旬過稍復理筆札呼君柩裏魂灑我筆下血憶君
始垂髫蘭芽蔚秀茁呱呱文祿中識者歎英物逾歲值
甲寅粵省聚苞槩揭竿滿城郊鄰縣多陷沒斗米幾百
錢洋船亦難達君時尙童州哺養恐長乏忍渴斧冰糜
耐飢飽糠茹輾轉風塵間惛憊少歡悅五歲又避兵海

夷肆猖獗僑寓小金焦茲寶山水窟君騎竹馬來軀體
正輕捷釣鰕循水涯彈鳥登木末未識離亂悲唬笑屢
喧聒頗遭羣兄呵或受阿嬖撻七歲始讀書羣經或涉
獵與元雖未能已復效塗抹十六學作賈持籌計工拙
縱慚班超豪且守計倪業緬惟敎授公妮古劇飢渴晚
逢西河灾誦讀日靡輟君時趨庭過鞠脰懷祇謁舐目
旋再明朗若金鏹刮純孝天所感何慚古先哲我爲京
國行君作珠江別亦知會面難歲月苦飄瞥臨歧轉無
語憫默益悲切仰觀飛雲翔側聽暮笳咽分將作鳴鴻
蹤蹟隔胡越昨我乘蜀輶君聞喜躍屣誓作萬里遊聚

糧逮旬，月季冬辭番禺，浹歲抵京闕。首夏踰蜀門，握手敘瑣屑。自言分袂來，蹤迹閒何闊。閒關隨仲兄，巖險備嘗閱。憶從黃巷過，道隘難並轍。前驅怒馬奔，作勢奮蹶齧。泥淖又縱橫，驚呼驟倉猝。旁趨得石崖，幸免頭顱裂。清晨臨濁河，薄夕不得發。飲馬寒波流，朔風吹凜冽。中流忽浪起，人鬼閒毫髮。雪濃衣帶僵，石拒舟楫滑。河流無十里，鼓勢甚溟渤。長年強支撐，快過箭離筈。抵岸時三更，溼雨透裘褐。急市僮奴歸，大嚼如刀截。古牆又傾積，飢鼠窺窳窳。坐依鑪火邊，談笑洗鞞襪。行過華州城，兵燹被胡羯。人面半黃臞，高顴深見骨。心疑坐軒車，直

下窺鼠穴又似王舍城。寧惡盡羅刹。冒雨來廣元。土鬆
石截薛極目。桔柏江空翠。若濡潑潛潭。舞蛟蚪急浪。橫
魚鼈撼簸。隨陽侯輕舟。若飄葉。每逢顛沛時。憂心輒忡
懅。喘定驚魂蘇。欲語先撝舌。我昨行西陽。君亦具膏秣。
相隨步夔巴。裘馬犯霜雪。學我嗜篇章。知我愛碑碣。雖
未識源流。頗能窺戶闥。晨夕必聚談。晏笑忘檢押。屈指
廿五年。此樂最懽懽。謂宜世世盟。親愛若蛩蟷。如今一
思惟。何異泡起滅。君病我已瘳。剛氏往持節。回來見汝
瘦。柴骨高聳。心知折翼祥。飲泣復抑遏。尚冀岐與黃。
潛從鬼伯奪。何知祖帳行。遽作泉壤隔。雅州發來書。五

內痛摧割嗚呼手足情撫棺未親訣王事迫奔波留滯
失裁決悔不早歸田與君共耕墾君體雖素羸受病果
寒熱恐或憊服侍奉乖調攝戢翼俄一棺痛惜恨稠
疊君才本中和匪若甘井竭摧殘及蕙芝天道果難說
又聞俗諺云作官恆造孽得無我罪愆致汝命殀歿聞
君屬纊時炯炯雙眸豁白云悟無生死去得解脫意者
靈芝宮仙籍曾注列歸來驂紫鸞世網謝羈縻君母我
清溫君婦我提挈我男卽君男暫俾服衰絰雖殊光虎
兒眉目尙秀黠他時荷門基或不愧貽厥君衣猶滿箱
君字尙盈篋試留作楹書庶可紹芳烈厝君法雲菴文

室頗修潔更喜同鬼庭草木森楸栝爲君閉帳幃爲君
陳像設爲君奠漿醪爲君焚迷迭幽明雖異路體會備
曲折但使君魄安庶幾我懷洽吾家住城西門望北裴
辭先人九弟昆壽各臻耆耄何哉門祚衰汝獨早戕伐
憑高叫帝閭下土苦難徹我還自西川哭泣出闌闌迸
淚如長河百川散漂沫無鬼則已耳有請來飲釀蜀土
乏奇珍莫厭酒肴劣君魂本薄弱風雨恐翻掀暫時留
劍南少住勿恇怯莫上雞頭關高峯森嵒嶮巨石如虎
牙巉巖勢咆勃未能望嶺南祇益增怛怛莫上灩澦堆
奔流瀉淖滴飢蛟厭人骸礪毒過蛇蝎呀呷涌紅波餘

怒猶未泄會當乘仲冬棹歌發嘔軋載汝靈輓歸飛渡
下閩粵君今侍高堂泉路勿遠涉君廁宜躬親髓修慎
毋缺爲言我勞薪病體正殢殢徑欲解羈還躬耕采薇
蕨平生愛典墳蓄意事搜括歸來賦囚山閉戶精肄習

我友呂邵馮

冕士前輩嘯篋
茂才伯蓉學博

英英盡人傑一從入夜臺

警歎希晉接爲我訊起居近否慮孤子君今已陳人瞑
目萬緣歇安能海山龕或有返魂牒來生縱相逢荒忽
亦難詰惟應入夢頻庶用慰蕭葛前年小女亡我淚甫
盈睫君時相慰存勸我善解撥如今君又殂憂端不可
掇百歲何足欣自茲慚獨活悠悠后土中舉目莽垓北

此恨何時平泰山變邱垤試吟大招篇仰望極寥泬

法雲菴詣亡弟厝棺處

羈宦巴南引退難兼旬纔得撫桐棺几筵豐備終何益
像挂清羸未忍看幸庇佛慈休厭寂初嘗鬼趣恐驚寒
歸雲莫遽思鄉切待趁夔門十月灘

讀陸務觀出城至呂公亭按視修隄詩書後

戰退江神力障瀾千年功績配隨刊腐儒但讀河渠志

豈識前人創造難

放翁原注云西州築隄織竹貯江不
二年輒壞意謂如吳中取大石鑿成

則可支久異日當有辦此者云云近日丁稚璜前輩督
蜀果廢籠石而用甃石未幾水大至石皆冲陷淹沒田
廬無算怨聲沸起朝廷至遣星使按驗仍用舊法乃
已始歎前人遺制具有深意非洞悉其利害不可妄議

更張也放翁所
言亦祇塵語耳

贈顧幼畊丈復初

問訊東吳顧虎頭幾年錦水弄扁舟
填詞跌宕推三影
撫劍悲涼託四愁
著述久同乾闥子
笑談平揖岸頭侯
因君重憶東洲老
臥聽琅玕萬頃秋
成都試院竹何子貞前輩手植也君嘗在子貞幕中襄校故末語及之

送梁荔圃大令同年融回粵

東風吹得梨花開
千樹萬樹如玫瑰
有時復吹故人到
堅坐花下飛金盃
廿年蹤迹各聚散
作吏同到涪江隈
羨君宰邑有奇政
大府正盼龔黃才
奈何投劾徑歸去

東坡先生詩集卷八
便要三徑除蒿萊道旁石人見應笑急流勇退何奇哉
嗟余入世苦迂戇方鑿圓枘吁可咍邇來變故更奇幻
覲面刀劍相推排白狗訂盟正難恃青蠅作弔終成災
甘言可聽若炙輠設伏相待猶翳媒感君憐愛近逾篤
放浪形迹無疑猜東流之水西逝日屈指聚首能幾回
君今鬢髮雪滿顙我亦齒髮非復孩相逢憫默不一醉
莫待白骨生蒼苔況君家住山水窟插天萬笏青成堆
雲淙樵麓絕勝處可許賤子頻追陪寄聲梅花問安否
毋使歲晏冰霜摧待余了却泡夢幻亦賦長歌歸去來
烏乎安得早賦歸去來爲君酒酣拔劍起舞歌莫哀

中巖寺

循澗不知遠鐘聲聞上方暗泉潑佛頂怪石踞僧房藉

草雅懷愜拈花塵事忘空門幾興廢回首感滄桑

寺本極宏

微經獻賊之亂
遂燬其大半

嘉定試院後有小亭每晴霽登之則三峩了了可

見余名曰望峩亭并系以詩

蜀人誇峩眉幾輩果探討亦如嶺南人未識羅浮道嘉
州有小亭突兀插晴昊遙看天外峯了了逞妍好三峩
及二峩離立若環抱白雲互其閒風過如曳縞大峩最
偉特招手似五老想見空濛中巖壑遞傾倒滃然金光

合霞采舒浩浩疑有華蓋君歲隳駐幢葆不爾佛塔前
聖鐙然鳳腦或如星晶熒或如波晶灝燐燐滿巖椒數
里炫奇寶伊昔古名山難到若海島裹糧試窮探往往
限晴潦儻無冲舉姿詎易拾瑤草我曹沉宦游出入戒
輿阜豈能屏人騶往覓安期棗茲山冠西南夙昔聞名
蚤潛修只僧尼跋涉讓夷獠眞面幸已逢私心慰祈禱
作詩示同儕質直乏詞藻猶勝天姥吟謫仙徒妄造天姥

一小邱耳毫無佳
景見方望溪文集

登忠山

影組跼塊塵解弢佇林薄陶情赴嘉招結想慰靈諾叢

巒攢筍尖孤巘聳蓮萼躡澗窺蘿門剝崖仰芝閣空潭
疑畫星昏穴偶冬電雲噓無定峯泉漱欲崩壑聳身愁
淩疏極目瞭寥廓吾生亦寄耳毫末泰山託厭隨田竇
游且遂向禽樂終焉侶鹿麋聊共守龍蠖

讀史

風露秋槩二尺光陳編相對意蒼茫除奸恨不揮神劍
療妒何曾有善方朱异官高任昉黜田蚡權重灌夫狂
是非何預今人事幾度臨風罷舉觴

寄郝吟仙廣文

雲臺

丹陽學舍

聞住丹陽廨荒涼草滿庭齋廚應無粥石室好爇經憶

昔妖氛煽曾霾戰血腥

謂吾鄉張忠武公

君行偶憑眺爲勒峴

山銘

唐孝子詩

孝子名兆元四川理番廳人父有德母劉氏孝
子事親至孝光緒二年十二月母病割股和藥
進之一服而愈四年三月父病尤亟將不起兆
元對天默禱並向竈神前祝告用薙髮刀將左
脇剖開摸出肝一片烹熟而薦其父不疑食之
人卽强健鄰里陳光耀等盛傳其事理番廳同
知傅君培梅據以上詳余偕丁稚璜前輩寶楨

爲之具題請

旌并作是詩

魯地毓璵璠荆南生把梓異哉夷獯中有此材質美君

不見至性過人唐孝子

解一

孝子居何許乃在理番廳其

地俗刁悍其人貌猙獰耳不聞書與史目不覩表與旌

孝子事親惟有敬且誠

解二

孝子阿母病割股以進之阿

母病瘥孝子危孝子不自悲但願阿母痊愈甘如飴人

謂孝子孝孝子曰此庸行耳勿令閭里知

解三

孝子阿父

病割肝以進之阿父病瘥孝子危孝子不自悲但願阿

父痊愈壽考臻期頤人謂孝子孝孝子復曰此庸行耳

勿使閭里知

四解

孝子非求名孝子非望報耿耿一片心

所望娛二老兒命何足留親年席長保持此懇惻誠鑒

之以蒼昊我疑孝子揮刃日定有鬼神默佑仙佛效靈

不然割肝割股焉得能更生

五解

閭里得聞之嗟呀稱不

已官吏得聞之欽敬咸仰止爲孝子旌閭爲孝子表里

冀足以風懦頑厚倫紀或疑孝子風采如龍鸞不知乃

是田間野夫耳

六解

慎哉末學輩持論多拘迂謬云至孝

不在殘體膚羣稱孝子戇又謂孝子愚孝子非愚實乃

至性曾閔徒夷俶蠢頑希有此勝爾絺章繡句之修儒

嗚呼孝子至孝前古無

七解

游甘露寺

一峯藏竹底竹外得天光
淺瀨通魚穴空崖聚蜜房
巾瓶添淨契蔬筍亦眞香
攜得山雲返城中作晚涼

登琴泉寺放歌

城東東山何磊落上干雲
霄氣參錯炎官火傘未曾窺
六月陰風猶噴薄就中最勝稱
琴泉雙塔蹲踞山之巔
廚空覓齋有飢鳥地僻奏籟無
寒蟬梓州郡侯吾舊識
宴客狂歌拓金戟放意聊尋洞
壑幽縱懷便恐乾坤窄
登高矯望西風來白沙迸入雲
濤堆遙看鹽井滿平野
旌竿萬丈高崔嵬昨聞蓬溪毀
官廩惡少奮起連椎埋

誅求無藝太苛刻積久恐復成禍胎吾

皇德澤邁前古忍使酷吏腹民財奈何建議法桑孔罔恤閭左流亡哀酒闌四座紛流涕耿耿星河半空墜參橫斗轉何足嗟實恐櫓槍動兵氣嗚呼歡會常生悲景物繁盛能幾時生前相遇且酣醉樂酒今夕吟風詩

送方子箴前輩

潛願歸里

中朝卿景想容儀霜鬢丹心四海知一代騷才誰抗席九州宦迹盡留碑是非近孰存公論慙直偏教忤盛時比似孤松深澗底摧藏休便損霜姿

無端赤舌起風雷名字幾疑陷黨魁便殺伯仁成底事

能爲孟博也奇才覆盆暫未邀餘照遺燼終當起死灰
畢竟

聖朝容直道不教詩案勘烏臺

閱盡浮雲點太空紛紛蠻觸孰雌雄宦途巖險逾瀧吏
世味升沈付塞翁翻羨不才甘擁腫始知有道是瘖聾

從今了却封侯夢且試黃芽坐守功

君近喜學道

盛世焉能老澗阿鴻冥聊復避虞羅還家賦就聲華澹
泊宅編成著撰多莫對青山談往事好從白日放高歌
他時若爲蒼生起休待徵書下薜蘿

尊經書院十六少年歌

并序

余甫至蜀張香濤前輩之洞語余云蜀才甚盛

當以五少年爲最謂綿竹楊銳井研廖登廷漢
州張祥齡仁壽毛瀚豐宜賓彭毓嵩也嗣余校
閱所及又得十一人因仿古人八仙九友之例
爲尊經書院十六少年歌其有績學能文而年
過三十者均不在此數凡諸生所作文字具見
余近刻蜀秀集中

宏農博瞻誰與侔手披七略函九流房星降精騁驂騑

蹴踏要到昆侖丘

綿竹楊銳字叔
嶠年二十一

廖子樸學追服劉校

勘審碣刊謬悠森森腕底攢戈矛

井研廖登廷字
助齋年二十七張生

爛爛雙電眸曹倉杜庫一覽收讀書欲徧秦與周嶄然

筆力迴萬牛

漢州張祥齡字子復年二十二

小毛詞翰揚馬儔如鴛青

翰凌滄洲珊瑚炫耀珠璣浮

仁壽毛瀚豐字鶴西年二十七

范君淵雅

文藻優長離宛宛昇雲游

華陽范溶字玉賓年二十四

鵠觚之孫內

衍修篤志墳典兼索邱問事不休賈長頭

華陽傅世洵字仲戡年二

十邱郎靜謐勤研嘖文學穰穰困倉稠

宜賓邱晉成字芸菴年三十

老籤詞筆雄九州字裏隱躍騰蛟蚪

宜賓彭毓嵩字籤生年二十七

清

河才調萬斛舟餘事筆札追鵠繇

樂山張肇文字梓亭年二十七

樂安

傲骨輕王侯神峯峻立恨少適稍加淬煉成純鉤

忠州任國

銓字箕甫年二十三

濂溪經學窮微幽遠媿孟喜兼施

成都周道洽字

潤民年短宋詞筆工雕搜華燭五色垂旌旂富順宋育仁字雲巖

二十四年十南豐詩卷清而瀏獨鶴矯矯鳴霜秋成都曾培字篤齋年二十

六延陵門內交唱酬如彼榮郁兼談彪振轡詞園扶輪

輶輶為吳昌基字聖俞年二十二從父廷佐廷傳廷俊亦均有詞藻東吳文學春華抽

若琢瑚簋鏗琳璆成都顧印愚字華園年二十一戴侯嗜古劇珍饈翩

翩下筆難自休看汝追逐登鳳樓江津戴孟恂字伯擊年二十八

送吳荆湄廣文同年鐸還楚

楚澤多蘭草靈均昔日栽遺芬誰復嗣之子鬱奇才壯

志恥書劍長歌歸草萊明年應獻賦待詔比鄒枚

題朱次民觀察在勤詩卷并贈

秋來挹袖少城隈，傾蓋談詩日幾回。
早歲從軍王粲作，中年憂國杜陵哀。
故應壇坫無餘子，誰說乾坤果忌才。
此是中興留閒氣，策勳端不讓雲臺。

試院無事，購菊數百本，疊成屏風，九層絢爛可愛。
戲作詩三首。

半是開殘半未開，萬枝扶作玉樓臺。
季倫步障文君錦，却到詩人冷圃來。

矮矮疏籬好護持，繞闌三匝日裁詩。
兒童未解思鄉味，爲話江樓斫鱸時。

鹿車勞頓實堪嗟，日坐空山聽放衙。
不審浮生能幾醉，

業敎三載負黃花

余自丙子出都丁丑試西陽戊寅試甯遠蓋不見黃花已三年矣

將解任留別蜀中士子八首

曰余奉

王命抗節臨峨岷馳驅盡皮骨忽復經冬春三年竟何得
蠹沒隨路塵簿書日迷悶恐失滄海珍未能整士習積
弊多因循慚蒙二三子遠送出城闌遠送亦奚事感此風
俗醇母令谿盜吏謂汝同狂榛曩見蜀帥云蜀人元宮保在貴州同鄉得薦保者萬餘人喪過渝州無一奠醢者余甚詫之後乃知大吏素惡川人州縣造爲此言以相媚悅也吁長民者之視聽詎可不慎哉

石室閱遺響元亭基亦夷大雅漸寥落良時方在茲讀

書首辨志高下隨所施譬如匠氏斲審用因物宜高才
擢梁棟小器成桷榱通經植深柢餘事兼文辭但求賦
性近一簣功勿虧負能苟致用何慮難逢時慎毋效擁
腫甘類樗櫟姿

聖學有坦途輪轅任趨赴鄭何暨程朱漢宋豈殊路瑣
屑侈謏聞逞新半逢故毋以客氣爭冥心自超悟嗟哉
講學人門戶積膠固燕雀聒啁啾蜉蝣炫朝暮吾道有
干城豈徒誇詬怒罵座如灌夫疏狂何足慕

讀書不求官廊廟誰燮理讀書但求官噉利却堪恥作
官如治家仰食動千指檢攝及興臺凌雜極鹽米向非

練習嫻睦目竟誰恃所以古達人經濟在謀始馬政及
河渠邊防兼地理掌故稽朝章度支籌國紀一一利器
儲庶足備驅使人爲璠璣珍出作杞梓美草廬有呂伊
庶雪腐儒恥

井田法旣廢庠序多棄貧亦有搢紳輩汲汲謀潤身我
曹不忍餓何以成偉人努力耐冰雪勿歎時運屯鼎鼎
程卓富視之若埃塵顏景褐衣士名重猶千鈞

今年試鎖闈歐九精鑒識

謂景芾庭許竹簣兩前輩

濟濟都講生雲

雷多奮翼俗儒畏窮經謂恐科第阨豈知績學人反仗
稽古力如彼雨澤敷施潤徧蓬蘴安有千丈松不蒙甘

澍渥遭逢自聽時勿受讐言惑本無風會殊趨驚竟何益

治國如治病勿使元氣戕但能固根本奚慮羸與疳我行涉渝水赫赫財賦疆比鄰奉祆教俗染何猖狂道喪向千載民愚實可傷所期青衿子砥礪扶綱常罄狩尙當格豈難化一鄉防閑各自慎鼠技安敢嘗盜牛諱名姓吾欽王彥方

昔聞牧令云蜀習漸凋倣刀筆工舞文鄉閭任橫恣我見殊不然無辜屢株累憤雪恆晝飛怪哉積冤氣痛茲虎而冠擇肉方搏噬我如一簣微豈敵江河勢欲援苦

未能五內實增愧大吏如不聞黃紬自鼾睡蜀中牧令多凌虐士

子妄行詳革余屢平反之然亦有厄於地方大吏不能盡申其志者泊余去任凡無辜者盡予開復大吏亦茫

然不省也

此邦多寶玉天府稱膏腴我來竟何得未益畝一區私

懷竊自幸拔擢多璠璣楊銳毛瀚豐富詞采張祥廖登

窮經畚粲粲十數子詳見前尊經書院十六少年歌輕煙耀華裾清河

楷張孝齒較長考訂箋蟲魚董含張均可性穎悟丁生樹誠學

尤劬蕭潤王安謝龍許以藩光馬宇僻壤生名駒劉承王

槐筆札擅劉光鄧宗經濟儲兩龔致道性孝友並美周

興謨興烈陳陳寶陳常西陽州人吳廷佐廷傳斯皆

興楷嘉樹陳錫祺宜賓人

魁壘士實學雄萬夫會當振翼去飛集承明廬持此潤
歸橐奚啻千明珠諒殊馬新息薏苡翻見誣

悵悵別江干雪花大如席平時無涕淚今日輒橫臆勿
爲兒女悲萍梗會相值異時儻偶逢君亦列執戟功名
何足誇根本在學植況今

中興時文治正騰赫共扶大雅輪砥礪各努力勗哉弼
承平經術資潤色懸知京輦游當許共晨夕

夜聞浣花江聲甚壯

束帶眞愁應接頻匡牀八尺憩勞身何知入夢猶喧聒
多事灘聲似送人

甫登舟楊叔嶠茂才

銳

等抵薛濤井相送賦謝

白日懸空際江流急鬢邊我心如落葉飛墮薊門前之
子遠相送驪歌殊黯然相逢幸珍重會奏上林篇

由中興場放船至彭山

江源本自清噴薄若碧玉其下涵水苔其傍蔭崖竹一
舟耶許來篙槳盡濡綠未如林畔人山水飫清福有酒
檐下燒有書樹閒讀時見茅茨陰炊烟凡幾幅我來不
暫停面目真覺俗却望東來船風帆一何速笑我似賈
胡中途紛躑躅

雨

何嘗驚旅客旅客自生愁遠嶺挂寒色長江添亂流晉
秦飛輓裕關隴甲兵休感此銷長恨無爲歎滯留

涪州對月

天公移得雪山來羣玉巉巖萬嶂開一道空濛添霧靄
數重凹凸見樓臺縱令佳境能重到未必清輝似此回
擬訪北巖亭榭圯愁聽蕭瑟澗松哀

讀水經

朝遊下龍門夕渡過伊闕輕颿扇長川波浪何淙涌煌
煌神禹功勳績鏤玉牒豈容千載餘么醜聚魚鼈童律
今不作何人紹芳烈原廟有神靈馨香固難沫

渭水象天門，黃山相暎帶。中有未央宮，遺基委榛薈。憶昔全盛時，雙闕矗雲際。飛閣依日行，華棖吐烟麗。君王每幸巡，萬乘徹天沸。旄戟列期門，雲韶響文陛。盛衰忽須臾，富貴隨水逝。雖殊晉庫災，且等周京慨。回首眺孤棱，踟躕獨流涕。

巫山高不極，帝女依北岑。駕螭輒來往，旦夕變晴陰。神居自詖蕩，薦枕寔所任。多事三楚士，諧譖進荒淫。捷塗終窘步，已矣非余心。

湘流自青青，回轉繞南岳。嬋娟斑竹林，孤根近何託。巖霜悴其柯，焉得不蕭落。聞有娥英祠，雲旗降寥廓。玉几

委蒼苔招魂徒寂寞

燕昭碣石館秦帝琅琊臺俯臨極海裔壯觀何雄哉千
年遞更變陵谷凡幾回蓬萊遽清淺慷慨心須哀舊時
射鯨處估舶紛往來樓臺蜃氣幻塵肆鮫宮開窮奢近
已甚烈火終焚槐世無曼倩叟誰識東溟灰

昆侖本天柱橫絕西北庭黃河出其側東注鳴砰訇斯
實帝懸圃美玉鍾晶瑩神區夙奧衍豈許刑天爭安能
穀黃督誅此狶與鯨北攻戮三蘂西射摧九嬰

昆明象滇池蛟蚪輒掀舞織女立其陽風鬟儼輕舉渡
漢果何時盈盈但延佇慎勿愆良期關津再修阻清秋

嚴霜零會見振河鼓

東南地維陷傾阨非一朝靈胥爾何恨憤薄噓洪潮馬
銜孽當路海童幻吹簫吾欲呼索勸彎弓射招搖橫草
有志士肯使朱旗驕

大道旣云渺正途多荆榛鄙哉章帶士不識典與墳邇
來更變幻異境何糾紛浮屠甫息燄徧地祠祆神吾聞
亶洲國弦誦猶振振褰衣欲往泝冀附靈查津

北風吹洞庭嫋嫋日將夕紛吾弭楫來拔劍起太息聞
有蛟鰐藏嘯聚成窟宅實恐噓霧雲曜靈將減色徘徊
惜空掌剗斷苦無力未知後來人誰擲澹臺壁

漢皋有游女被服嬉中洲借問誰家子出身自青樓足
躡五絲履頭插珊瑚鈎眾婢旣雜進戚施紛混投多財
妄自炫逐逐君子羞豈知弄珠女可望不可求

我我耨達山渺渺恆河水舊時王舍城延袤凡幾里精
藍四萬區鈴鉢天際起似聞金玉場久化羶腥市鶉墟
竟賜秦帝醉胡至此豈無訟九閭愁憤果誰理已矣蹈
海行將隨魯連子

平都山

酆都之山羣鬼庭荒軼怪異傳圖經我攜一枝柳栗杖
直倚萬疊芙蓉屏陰崖鑿竅開羣牖古木垂陰泣百靈

試奏笛聲如鶴唳故應塵界舉頭聽

食菜

芡實圓勝珠晚菰潔如玉作羹宜芋魁配豉須野菰亦
有蕪筍佳美敵花豬肉錦綳初脫嬰戢戢遂盈束三年
住西川供億窮水陸何嘗一飽懽冠帶若囚梏自從謝
華簪樽酒慰幽獨始知顯宦榮豈及老農福何以佐嘉
觴陶詩清可讀愧無經綸才吐出藜莧腹

翠屏山陸宣公衣冠冢

鄴侯貶謫許歸山裴令終容綠野還豈謂孤臣傷顛直
遽教遺骨朽榛菅經綸何必非三代風采猶當照百蠻

恰與此峯同。聿完翠屏千丈絕躋攀。

巫峽

一出陽臺外。峯峯列筍齊。不知千萬岫。何處接丹梯。古木亂無次。冷猿時一嘯。莫愁江路險。鎖鑰重川西。

放舟下瞿唐峽作歌

冬十二月灘水平。激碧激豔微風生。我舟忽若蜻蛉輕。一瞥掠破圓鏡明。鯨呿鼉擲了不驚。但愛巖壑紛送迎。神峯娟妙尤亭亭。不聞猿聲聞鳥聲。頗疑志乘多誇稱。虎牙人鮓徒強名。吁嗟世事妨翻覆。倏忽波濤起原陸。君不見瞿唐夏日蛟鱷雄。白浪掀天大如屋。

歸州

歸州三峽內已似在雲巖亂石聚成市孤城低飲灘又
魚蘆柵密防虎竹籬完咫尺北風阻因悲行路難

謁三閭大夫祠

婁砧仍在否遺像仰精靈詞賦開三楚文章儷六經江
離非故國岸芷有遺馨彼美如升降應宜駕翠輶

懷蜀中故友四首

朱次民廉訪在勤

長鯨穴金陵禍本遂延蔓滇池限西南亡命遽奔竄朱
侯練鄉兵實靖閩左亂尊人方伯公報最百城冠帝曰

界大藩全秦藉屏翰君夙稟庭規六韜妙幽算寇戎除
陸梁邑里資衛扞是時回逆多青犢縱驍悍虎鬪乾坤
昏狐噪墟落散作詩備采風高義切雲漢酸涼七哀吟
惻愴九歌歎拳拳遇亂萌太息極悲惋及乎氛祲銷河
海盡夷晏上旆錦官城檣舟空靈岸詩格瀾老蒼波瀾
恣瀾漫落落霄鳳翔枝枝霜鶻健子實揚馬才未草五
花判鬱勃起風雲崎嶇邁危患今秋返成都辭后各償
願談詩遂訂交微細析分寸痛念乾嘉來正音何靡曼
羽檄日交馳英儒多困頓亦有講學徒樹頗妄持論訓
詁搜孤離朝章誦斷爛肆口詆雕蟲狂言任夸誕起衰

仗吾徒願各策驚鈍斯文苟未亡長夜要終旦聞我辦
嚴時君抱子荆恨交深別轉難人事歎羈絆知音懷項
斯佳作誦王粲却望輿鬼躔懸知夜虹貫

黃翔雲觀察

雲鶴

江夏古循吏盎然若春曦見人貌溫妯三日談未疲蚤
年宦郎署文告咸手披謹慎馮奉世謙恭鄭當時危言
忼權貴氣宇不少卑旁觀愕咋舌君獨神暇怡五馬始
出首備兵邛雅匪導輿奉賢母夾路爭嗟咨咸欽渤海
政亦仰宣文慈迄今十裘褐嘖嘖留口碑蘆山昨飛報
篝火鳴神祠單騶往定變力却旌與麾局試聚多士煌

煌文告垂白徒盡斂迹未敢藩籬窺元氣默迴幹害根
斯漸彌不然興大獄詎少瓜蔓滋方今赤緊吏罔恤民
瘡痍動云俗刁悍鞭策恆妄施膏脂恣朘削鉗網輕誅
夷豈能禁赤子呼晷號天悲紛紛赴闕愬詎盡民俗漓
治蜀貴嚴猛此語殊有疵亂國用重典

盛朝非所宜但當去害馬奚可朘羈雌感君抱惻隱專
澤周黎儀持論異凡吏曷愧慈惠師又嘗痛士習遷轉
尤怪奇文章詆韓杜書法輕獻羲宋儒若涕唾拊擊尤
靡遺追惟數先輩此咎安得辭狂泉有前導今更橫流
衰每聞抵掌論覲面眞悔遲江干忽分手何以慰素思

相期早奮袂參錯連封圻時雨潤萬物豈惟巴夔私

顧幼畊參軍

復初

梁州西南維擇帥須俊傑參謀妙選才亦足資剖決顧
侯東吳精天機妙超豁新詩窮推敲字字灑蘭雪吳富
皆後塵陰何可方轍折腰恥微官棄去若屎橛抵掌青
油中高談氣畢光咸豐昔季年妖醜肆猖獗麒麟鬪日
光劍閣半流血峩峩花縣公勇氣實咆勃指揮五陽兵
次第埽羣孽鞠躬率同僚蔬布勵廉潔愛才薦剡殷剔
蠹弊奸絕士女騰謳思瘡痍盡蘇活及乎撤瑟候號慟
徧城闕家家素望施戶戶香醪例如彼峴山碑經過便

悽咽完顏繼握符季札遞持節皆承蕭何規境邑幸安
帖君恆贊戎機元氣默迴斡湔沫有晏流岷嶓無杌隍
比來大府賢負才亥矜伐任政輕袁滋忌能軋張說倡
言肆抵排突欲過前哲建謀實滔滔施用則已悖決川
壞隄防變法及鹽鐵怨謗滿里閭臺評交論列睠惟古
大臣延訪愼施設豈容治絲夢遂克樹功烈昨者嚴風
寒江樹落騷屑叫嘯鵠鵒鳴悲號猿狖絕吟君近數詩
正義揭日月如聞勞者歌四座皆凜冽君本孤冷人憂
國獨腸熱放言豈阮嵇託志實稷契詩騷怨誹詞此義
未磨滅正論同箴砭古音振疏越感此念時艱高歌唾

壺缺

錢徐山大令 寶宣

錢侯胡輦姿磊落德門裔伊昔尙書公文藻鬱辨麗遭
遇乾隆朝雲龍託眞契是時海宇康士女笙歌沸六飛
數

南巡珥筆出入侍時邀丹露題燦爛銀鈎字南樓工寫
生花鳥妙精緻亦復膺

御褒翟茀傳盛事文孫得黃門經學迴深邃詩傳鄭氏
箋書撰王粲記至今大梁門多士精講肄君也產渥洼
千里期遠至胡爲困風塵僕僕隨小吏自言喪亂來吳

越滿兵騎承平人物凋故舊文獻墜藏書三萬籤標
委烽燧又言家運屯鴈原橫涕泗八口寄錦城行歌曰
憔悴往歲主舉比巢林暫棲憩英才萃薛裴實學得回
賜羞隨野鷺爭翩作冥鴻避嗚呼髮捻狂儒冠業遭廢
大帥出戎旃愛才亦虛僞豈宜瓦礫尊周鼎反憎棄諒
同中散愁堪下步兵淚君昨江油行揖別意彌摯白日
照衣裳迴颿動旌旆未知行路難何自重把袂永懷零
雨章出郊載酸鼻更憶舜舉翁兼謂鐵江大令負才並瓌異各
抱經濟能俱鬱踴躍志吾聞古達人憂患垂彖繫著書
如已成幸寄黃車使

正月初三夜夢顧幼畊丈贈余畫扇十數幀并云
持贈京華貴人亦不俗也余曰正恐貴人無福
消受耳相與大笑扇多畫枯木寒林景內一幅
寫一橋旁植巴苴十數本橋下臨絕澗無路可
通對面爲石崖千仞聳秀可愛中闢一洞飛泉
兩道由半山下垂奔注洞口若張簾然其激薄
流入澗中者尤奇譎萬狀有一叟戴小笠依洞
中立泉瀾瀾從脰下過惟衣服略不濡溼與橋
上二客相語余一見曰此仙游潭景也余昨曾
至其地幼畊首肯者再遂霍然而醒案仙遊潭

在玉女洞中余丙子歲過鳳翔時以不游爲憾
不審夢中何以能識其景豈前生與此山有緣
耶抑異日當詣其地耶爰賦二詩以紀其事但
未知洞中光景果與夢境相符否耳并擬他時
覓人寄幼畊乞補此圖也

夢想秦山日幾回胸中邱壑豁然開前身疑是潭邊客
曾爲東坡調水來

錦官詞客鬢毛斑點筆滄江日未閒我欲追魂尋故事
乞君重畫夢中山

枝江縣庾臺相傳子山故宅

留滯咸陽不可聞
高臺千古尙江濱
文章瓌麗原初祖
身世蒼涼信恨人
秦時漢靈資眺覽
越吟胡拍足悲辛
此才若竟南朝老
祇逐江郎狎客塵

章華臺

武關西入渚宮亡
三戶遺黎劇痛傷
一樣荒淫偏不幸
更誰焦土惜阿房

望洞庭湖口懷仲兄

壬戌歲偕仲兄同泊此

洞庭春始到
便作綠泠泠
遠似芳草颺
非關垂柳青
聞歌久延佇
對酒愁獨醒
感念同游子
浦雲空杳冥

上海客舍題壁

殿前借箸竟何人誰使中原雜虜羣
市舶聚成蛟鱷宅胡笳吹動犬羊羣
百年業變伊川俗九伐終期仲父勲
側想平戎誰獻策幾回憑眺望吳雲

題友人出關圖

形勝飛狐萬仞奇太行脈絡此分支
白頭戍卒當關臥能話

高宗駐蹕時

柳塞頻年靖鼓鼙空勞險要扼天梯
如今不用防關塞請縛樓蘭向海西

抵京寓米市胡同庭前隙地頗多遍栽花木紅紫

爛然因取東坡語自署所居曰最堪隱齋

平生傲晚忘華簪城居境比山居深近除磽确草三徑
忽放紅紫花滿林賞翫轉添留客局護持猶是愛才心
攜鋤賴有吳剛共

時與吳星樓
比部同寓

不用東籬步屨尋

送張瑞穀水部同年

嘉樹
還粵

張侯別我慘不樂對酒當歌意蕭索自言仕宦無中人
歸向南山臥雲壑張侯昔日南中珍歛然地上行騏驎
朝馳幽并暮炎徼指顧萬里無埃塵昨者紫皇開祕府
玉斧山圖傳瑤戶或騎鳳皇跨鸚鵡憑天窗叩天鼓白
日忽震豐隆怒紫電橫飛掣金虎桃花落盡春蕭騷欲

訴青禽不得語。罡風吹墮銀河邊。白榆冷落今幾年。僊
伶赤松棄不顧。祇有孤淚流清鉛。我謂張侯豈得已。古
來萬事如逝水。君不見禹王櫟輶平九州。不平今古茫
茫愁。屈原宋玉復鑿混沌竅。遂令千秋才士大半多離
憂。阮藉嘯不休。唐衢哭不止。杜甫憤莫平。盧仝恨莫已。
李賀嘔心徒爾爲。孟郊登第何堪喜。荆山之隨和適用
不及珉。與璫無鹽弄母嬪。西子下里奏曲輕韶鈞。由來
妍媸易顛倒。不獨君輩傷沈淪。送君行爲君起。君乘浮
槎八千里。笑釣靈螯海門底。歸來醉臥雲臺峯。上有萑
蒲作葺柴。安期采之曾得仙。玉舄化去凌雲煙。浮邱肩

上珊樹綠挹袖可與長周旋
揖鮑靚呼稚川游戲下界
窮八埏何必更羨蓬萊船
人生觸境須愉悅不爾六龍
去飄瞥要抑愁心變壯心
莫令綠髮成華髮嗟余亦是
悠悠人與君蹤跡常共親
秋來移疾謝簪組亦擬歸泛
珠江
膾下鄰有願應先訂
準備羅浮麴米春